

Powšitkowne WOZJEWJENJA

njedźelu, 23. decembra 2018

20. raz koparski turněr wo pokal TCM

Towarstwo Cyrila a Metoda z.t. (TCM) zarjaduje sobotu, 5. januara, w 15.30 hodź. w Chróšćanskej „Jednoće“ 20. raz halowy koparski turněr wo pokal TCM. Přeprošene su wosadne a wjesne mustwa młodžiny kaž tež mustwa sportowych jednotkow. Kóždy mustwo měło z wosom hrajerjemi nastupić. Hrać budže so z třomi koparjemi a wrotarjom. Přizjewić měli so mustwa hač do soboty, 29. decembra, pola Guida Zahrodnika w Jaseńcy, telefonowe čisło (03 59 33) 3 11 53 abo mobilnje pod (01 51) 52 22 17 59.

Hodowny koncert w Radworju

Swój lětuši hodowny koncert wuhotuje chór Meja sobotu, 29. decembra, w 17 hodź. w Radworskim hosćencu „Meja“. Jako hosći su sej Mejenjo swój wumělski dorost přeprošyli. Koncertej přizamknje so bjesada ze zhromadnym spěwanjom a překwapjenku. Wšitcy su wutrobnje do Radworja přeprošeni.

Hodowny beneficy nyšpor

Chór Lipa a instrumentalisća wuhotuja njedźelu, 30. hodownika, w 17 hodź. w Róžeńčanskej cyrkwi swój tradicionelny beneficy nyšpor. Zběrka při durjach budže za restawrowanje hnadowneje postawy w putniskej swjatnicy. Wšitcy lubowarjo hodownych zynkow su lubje přeprošeni.

Silwester do Baćonja

Lětuši silwesterski hudźbny nyšpor z meditacijemi k wukóncej lěta pónđzelu, 31. decembra, w 19 hodź. w Baćonju wuhotuje młodžinski chór Baćońskeje wosady. Wšitcy su wutrobnje přeprošeni.

Na skawtsku hodowničku ze spěwnym wječorkom!

Serbscy skawća přeprošuja Was na skawtsku hodowničku sobotu, 29. decembra, do Don Boskoweho domu we Worklecach, kotraž zahaji so w 15 hodź. z nyšporom we Worklečanskej kapalce.

Po nyšporje maće při šalce kofeja składnosć, nowonastatu skupinu wjelčatow bliže zeznać a přednoškej wo lětušej skawtskej kanu-turje připosluchać. Nimo toho móžeće so při wšelakich aktiwitach sami kreatiwnje wuspytać. Wot 18.30 hodź. pokročuje so ze spěwnym wječorkom. Tuž su nimo aktiwnych a něhdyšich serbskich skawtow a zajimcow tež wšitcy lubowarjo serbskeho spěwa nanajwutrobnišo witani.

Hodowny koncert w Chróšćicach

Tradicionalny hodowny koncert Chróšćanskeho cyrkwinskeho chóra wotměje so njedźelu, 6. januara, w 14 hodź. w tamnišej farskej cyrkwi. Nimo skerje znatych hodownych spěwow zaklinča někotre klasiske překwapjenki. Koncert, na kotrymž tež instrumentalisća a młode talenty sobu skutkuja, budže Michał Cyž nawjedować.

Termin za putnikowanje do Krupki jasny

Putnikowanje serbskich młodostnych klětu do Krupki budže wot 28. julija do 2. awgusta. Nadrobnošće so hišće wozjewja.

Kurs k přewodženju ćežkochorych a mrějacych

Nowy přihotowanski kurs k přewodženju ćežkochorych a mrějacych zahaji so srjedu, 6. februara, w zetkawanskim domje Carity w Kamjencu, Dróha jednoty 2. Wukubłanje přewjedu koordinatorjo ambulantneje hospicneje služby, zo bychu zajimowanych ludźi na tule čestnohamtsku službu přihotowali. Chorych a mrějacych přewodžeć je wutrobna naležnosť, tola słuša k tomu tež wěsta wěda, zo móhło so sensibelnje na požadosće jatra chorych a mrějacych reagować, skedźbnja Caritas. Pod hesłom „Přewodžeć nawuknyć“ ma kurs hač do 7. měrca trać – a to kóždu srjedu wot 17 do 21 hodź. kaž tež na dwěmaj sobotomaj wot 9 do 15 hodź. Přeprošeni su mužojo a žony rozdźělных starobow a powołanjow, kotřiž su na sobudźěle w ambulantnej hospicnej službje zajimowani, kaž tež wukubłani hladarjo chorych a starych ludźi. Přizjewjenja su móžne w domje Carity na Haydnowej 8 w Kamjencu, telefonowe čisło (0 35 78) 37 43 12. Tam dóstanu zajimcy nadrobniše informacije.

Putnikowanja z busom a lětađłom

Tež klětu přeprošuju zaso zajimcow na putniske jězby. Přenja powjedže wot njedzele do njedzele, 23. do 30. junija, z busom do Toskany. Dalša putniska jězba z busom budže wot štwórtka, 3. oktobra. do wutory, 15. oktobra, do Lourdesa, Fatimy, Santiaga de Compostele a do Avile. Z lětađłom podamy so wot njedzele do njedzele, 8. do 15. septembra, na putnikowanje do Swjateho kraja. Nadrobniše informacije dóstanu zajimcy pod telefonowymaj čisłomaj (01 63) 7 33 82 05 abo (03 57 96) 9 54 28 (po 19 hodź.) abo pola mje w Hórkach, Sydlišćowu puć 2. *Maćij Hadank*

Klětu putniska jězba do Ukrainy

Putniska jězba do ukrajskeho Lwiva (pólsce Lwów, němsce Lemberg) wotměje so wot štwórtka do wutory, 8. do 13. awgusta 2019, ze Šmitec jězbami w Radworju. Hłowne město zapadneje Ukrainy je ze swojimi stawiznami a kulturu wulce zajimawe. Wšako je w běhu swojich stawiznow přežiwiło pólske, rakuske, sowjetske a němske knjejstwo. Wobdźělmy so na swjatočnej Božej mši po grjeksko-katolskim wobrjedže, wopytamy mniši klóšter w Univje, wobhladamy sej katolsku uniwersitu, pórdžemy do opery a zetkamy so z wěriwymi woneho města. Změjemy přewod domoródnego kulturnika.

T. Kubašec